

ZAKON O PREUZIMANJU PRAVA I OBAVEZA OSNIVAČA NAD USTANOVAMA SOCIJALNE ZAŠTITE U FEDERACIJI BIH

Sl. novine FBiH br. 31/2008 i 27/2012

I. OSNOVNE ODREDBE

Član 1

Ovim Zakonom Parlament Federacije Bosne i Hercegovine preuzima prava i obaveze osnivača nad ustanovama socijalne zaštite u Federaciji Bosne i Hercegovine i to:

- Zavodom za zbrinjavanje mentalno invalidnih lica u Fojnici,
- Zavodom za zbrinjavanje mentalno invalidnih lica Bakovići,
- Zavodom za zaštitu djece i omladine u Pazariću,
- Zavodom za vaspitanje muške djece i omladine u Sarajevu,
- Zavodom za vaspitanje ženske djece i omladine Ljubuški.

Član 2

Zavodi iz člana 1. ovog Zakona (u daljnjem tekstu: zavodi) su javne ustanove u vlasništvu Federacije Bosne i Hercegovine, imaju svojstvo pravnog lica i svoju djelatnost ostvaruju na teritoriji Federacije Bosne i Hercegovine.

Član 3

Na rad zavoda, imenovanje i razrješenje tijela upravljanja i rukovođenja i druga pitanja koja nisu uređena ovim Zakonom primjenjuje se Zakon o osnovama socijalne zaštite, zaštite civilnih žrtava rata i zaštite porodice sa djecom ("Službene novine Federacije BiH", br. 36/99, 54/04 i 39/06) i Zakon o ustanovama ("Službeni list RBiH", br. 6/92, 8/93 i 13/94).

Federalni ministar rada i socijalne politike donijet će, u roku od šest mjeseci od dana stupanja na snagu ovog zakona, propis o standardima za rad i pružanje usluga u ustanovama socijalne zaštite u Federaciji Bosne i Hercegovine.

II. DJELATNOST ZAVODA

Član 4

Zavod za zbrinjavanje mentalno invalidnih lica u Fojnici nastavlja rad pod nazivom: Zavod za zbrinjavanje mentalno invalidnih lica - Drin.

Djelatnost Zavoda iz stava 1. ovog člana je socijalno i zdravstveno zbrinjavanje, osposobljavanje za samostalan život i rad prema preostalim sposobnostima i sklonostima i provođenje radne aktivnosti lica sa invaliditetom sa smetnjama u psihičkom razvoju umjerenog, težeg i teškog stepena, lica sa kombinovanim smetnjama, kao i lica kod kojih je završeno liječenje u zdravstvenim ustanovama.

Član 5

Zavod za zbrinjavanje mentalno invalidnih lica Bakovići nastavlja rad pod nazivom: Zavod za zbrinjavanje mentalno invalidnih lica - Bakovići.

Djelatnost Zavoda iz stava 1. ovog člana je socijalno i zdravstveno zbrinjavanje, osposobljavanje za samostalan život i rad prema preostalim sposobnostima i sklonostima i provođenje radne aktivnosti odraslih lica sa invaliditetom sa smetnjama u psihičkom razvoju umjerenog, težeg i teškog stepena, lica sa kombinovanim smetnjama, kao i lica kod kojih je završeno liječenje u zdravstvenim ustanovama.

Član 6

Zavod za zaštitu djece i omladine u Pazariću nastavlja rad pod nazivom: Zavod za zbrinjavanje mentalno invalidne djece i omladine - Pazarić.

Djelatnost Zavoda iz stava 1. ovog člana je socijalno i zdravstveno zbrinjavanje, obrazovanje i osposobljavanje za život i rad prema preostalim sposobnostima i sklonostima i provođenje radne aktivnosti djece i omladine do 25. godine života sa invaliditetom - sa smetnjama u psihičkom razvoju umjerenog, težeg i teškog stepena, kao i lica sa kombinovanim smetnjama.

Do popune kapaciteta u Zavodu iz stava 1. ovog člana može se osigurati zbrinjavanje i lica starijih od 25 godina života sa invaliditetom - sa smetnjama u psihičkom razvoju umjerenog, težeg i teškog stepena, lica sa kombinovanim smetnjama, kao i lica kod kojih je završeno liječenje u zdravstvenim ustanovama.

Član 7

Zavod za vaspitanje muške djece i omladine u Sarajevu nastavlja rad pod nazivom: Zavod za vaspitanje muške djece i omladine - Sarajevo.

Djelatnost Zavoda iz stava 1. ovog člana je socijalno i zdravstveno zbrinjavanje, obrazovanje i osposobljavanje vaspitno zanemarene i zapuštene muške djece i omladine upućene na osnovu odluke suda ili organa starateljstva.

Član 8

Zavod za vaspitanje ženske djece i omladine Ljubuški nastavlja rad pod nazivom: Ustanova iz djelokruga socijalne zaštite - Ljubuški.

Djelatnost Ustanove bit će utvrđena uz saglasnost sa općinskim i kantonalnim organima vlasti.

Član 9

Zavodi se mogu, u skladu sa zakonom, pored osnovne djelatnosti, baviti dopunskom privrednom i drugim djelatnostima (proizvodnja i prodaja hrane na vlastitim farmama, proizvodnja i prodaja određenih proizvoda u vlastitim radionicama i dr.).

III. NADZOR NAD STRUČNIM RADOM I NADZOR NAD ZAKONITOŠĆU RADA ZAVODA

Član 10

Nadzor nad stručnim radom i nadzor nad zakonitošću rada zavoda vrše Federalno ministarstvo rada i socijalne politike, Federalno ministarstvo pravde, Federalno ministarstvo zdravstva i Federalno ministarstvo obrazovanja i nauke, svako u okviru svoje nadležnosti.

Federalni ministar rada i socijalne politike donijet će, uz saglasnost ostalih ministarstava koja imaju također pravo nadzora, u roku od šest mjeseci od dana stupanja na snagu ovog zakona, propis o vršenju nadzora nad stručnim radom i pružanju stručne pomoći ustanovama socijalne zaštite u Federaciji Bosne i Hercegovine.

IV. FINANSIRANJE DJELATNOSTI ZAVODA

Član 11

Sredstva za rad zavoda osiguravaju se iz naknada za obavljene usluge.

Cijene smještaja u zavodima određuju se za obavljanje usluge smještaja, ishrane, socijalne zaštite, zdravstvene zaštite, obrazovanja i vaspitanja.

Cijenu smještaja u zavode utvrđuje upravni odbor zavoda, uz prethodnu saglasnost Federalnog ministarstva rada i socijalne politike.

Sredstva za osnovne potrebe smještaja i ishrane korisnika osigurava fizičko ili pravno lice koje je ugovorom preuzelo obavezu plaćanja troškova smještaja.

Sredstva za zdravstvenu zaštitu korisnika snosi nadležni nosilac zdravstvenog osiguranja.

Sredstva za obrazovanje i vaspitanje snosi nadležni organ obrazovanja.

Višak prihoda nad rashodima zavodi koriste za obavljanje i razvoj svoje djelatnosti.

V. ORGANI UPRAVLJANJA I RUKOVOĐENJA

Član 12

Federalno ministarstvo rada i socijalne politike imenuje upravni odbor i nadzorni odbor zavoda, u skladu sa Zakonom o ministarskim, vladinim i drugim imenovanjima Federacije Bosne i Hercegovine ("Službene novine Federacije BiH", broj 34/03).

Vlada Federacije Bosne i Hercegovine daje saglasnost na imenovanje upravnog odbora i nadzornog odbora zavoda.

Upravni odbor ima pet članova.

Nadzorni odbor ima tri člana.

Upravni odbor zavoda imenuje direktora zavoda, uz prethodnu saglasnost Vlade Federacije Bosne i Hercegovine.

VI. PRIJELAZNE I ZAVRŠNE ODREDBE

Član 13

Kantoni mogu naknadno postati suosnivači ovih zavoda.

Član 14

Ovaj Zakon predstavlja osnivački akt na osnovu kojeg će se izvršiti upis zavoda u sudski registar.

Član 15

Danom stupanja na snagu ovog Zakona prestaju se primjenjivati: Zakon o Zavodu za zbrinjavanje mentalno invalidnih lica ("Službeni list SRBiH", br. 4/72 i 36/76), Zakon o Zavodu za zaštitu djece i omladine ("Službeni list SRBiH", broj 24/74), Zakon o Zavodu za vaspitanje muške djece i omladine u Sarajevu ("Službeni list SRBiH", broj 37/83) i Zakon o Zavodu za vaspitanje ženske djece i omladine u Sarajevu ("Službeni list SRBiH", broj 37/83).

Član 16

Ovaj Zakon stupa na snagu narednog dana od dana objavljivanja u "Službenim novinama Federacije BiH".

***Samostalni član Zakona o izmjenama i dopunama
Zakona o preuzimanju prava i obaveza osnivača nad ustanovama socijalne zaštite u Federaciji
Bosne i Hercegovine***
(*"Sl. novine FBiH", br. 27/2012*)

Član 3

Ovaj zakon stupa na snagu osmog dana od dana objavljivanja u "Službenim novinama Federacije BiH".